

GRAD NOVI PAZAR

SKUPŠTINA GRADA

Odbornička grupa SDA Sandžaka

Novi Pazar

17. mart 2024. godine

P R E D S J E D N I K U

SKUPŠTINE GRADA NOVOG PAZARA

Na osnovu člana 44. stav 1. i člana 149. Statuta grada Novog Pazara („Službeni list grada Novog Pazara“, broj 6/19), člana 44. stav 1. i člana 138. stav 1. Poslovnika Skupštine grada Novog Pazara („Službeni list grada Novog Pazara“, broj 6/19) podnosimo **PRIJEDLOG ODLUKE O OBRAZOVANJU ANKETNOG ODBORA RADI UTVRĐIVANJA ČINJENICA I OKOLNOSTI U VEZI SA ULOGOM KOALICIJE SNS-SDP-SPS U POKUŠAJU IZAZIVANJA FIZIČKOG SUKOB A ŠIRIH RAZMJERA IZMEĐU GRAĐANA NOVOG PAZARA 18. 19 I 21. DECEMBRA 2023. GODINE**, sa prijedlogom da se, shodno članu 109. Poslovnika Skupštine grada Novog Pazara, uvrsti u dnevni red i donese na sjednici Skupštine grada koja će se održati 18. marta 2024. godine.

Odbornici SDA Sandžaka u Skupštini grada

dr. Adem Đerlek

Džanan Bačićanin

Merfid Kamešničanin

Maida Baltić Spahović

Saima Brunčević

Dinheta Pulić

Kenan Kadrić

Kadir Trubljanin

Adem Pepić

Ilma Dupljak

Ovlašćeni predstavnik predlagača je odbornik Merfid Kamešničanin

PRIJEDLOG

Na osnovu člana 20. stav 1. tačka 15. i člana 36. stav 1. Zakona o lokalnoj samoupravi („Službeni glasnik RS“, broj 129/2007, 83/2014 – dr. zakon, 101/2016 – dr. zakon i 47/2018), člana 46. stav 1. tačka 56) i i člana 147. Statuta grada Novog Pazara („Službeni list grada Novog Pazara“, broj 6/19), člana 96. 97. i 137. Poslovnika Skupštine grada Novog Pazara („Službeni list grada Novog Pazara“, broj 6/19), Skupština grada na sjednici održanoj 18. marta 2024. godine donosi

O D L U K U

o obrazovanju Anketnog odbora radi utvrđivanja činjenica i okolnosti u vezi sa ulogom koalicije SNS-SDP-SPS u pokušaju izazivanja fizičkog sukoba širih razmjera između građana Novog Pazara 18. 19. i 21. decembra 2023. godine

Član 1.

Obrazuje se Anketni odbor Skupštine grada Novog Pazara, kao povremeno radno tijelo, radi utvrđivanja činjenica i okolnosti u vezi sa ulogom koalicije SNS – SDP – SPS u pokušaju izazivanja fizičkog sukoba širih razmjera između građana Novog Pazara 18. 19. i 21. decembra 2023. godine.

Član 2.

Anketni odbor iz člana 1. ove odluke čine predstavnici opozicionih izbornih lista zastupljenih u Skupštini grada Novog Pazara i to: tri (3) predstavnika izborne liste SDA Sandžaka – dr. Sulejman Ugljanin” , te po jedan (1) predstavnik izbornih lista “Edin Đerlek Gradonačelnik – Promjena je pobjeda” i “Građanski pokret Sandžaka – Za život dostojan čovjeka”.

Predsjednik Skupštine, će donijeti posebno rješenje o imenovanju članova Anketnog odbora u roku od 48 sati, na prijedlog predsjednika odborničkih grupa odnosno na prijedlog odbornika svake od izbornih lista navedenih u stavu 1. ovog člana.

Predsjednika Anketnog odbora odrediće izborna lista “SDA Sandžaka – dr. Sulejman Ugljanin”.

Član 3.

Zadatak Anketnog odbora je da utvrdi činjenice i okolnosti u vezi sa ulogom koalicije SNS – SDP – SPS u pokušaju izazivanja fizičkog sukoba širih razmjera između građana Novog Pazara 18. 19. i 21. decembra 2023. godine.

Anketni odbor ima pravo da od organa javne vlasti, službi i organizacija, traži podatke, isprave i obavještenja, kao i da uzima izjave od pojedinaca koje su mu potrebne za izvršenje zadataka utvrđenih ovom odlukom.

Anketni odbor je dužan da zadatak iz stava 1. ovog člana završi u roku od 30 dana od dana donošenja ove odluke, i da pisani izveštaj sa prijedlogom mjera dostavi Skupštini grada na razmatanje te da upozna širu javnost sa sadržinom izvještaja i utvrđenim činjenicama.

Član 4.

Prvu sjednicu saziva predsjednik Anketnog odbora.

U radu Anketnog odbora primenjuju se odredbe Poslovnika Skupštine koje se odnose na rad radnih tijela.

Administrativno – tehničke poslove za potrebe Anketnog odbora vrši odjeljenje nadležno za skupštinske poslove, dok uslove za rad Anketnog odbora obezbjeđuje načelnik Gradske uprave za izvorne i povjerene poslove.

Član 5.

Ovu odluku objaviti u „Službenom listu grada Novog Pazara“.

SKUPŠTINA GRADA NOVOG PAZARA

Broj:

U Novom Pazaru, 13. mart 2024. godine

PREDSJEDNIK

O B R A Z L O Ž E N J E:

Pravni osnov za donošenje ove odluke sadržan je u:

- članu 20. stav 1. tačka 15, i članu 36. stav 1. Zakona o lokalnoj samoupravi;
- članu 46. stav 1. tačka 56) i i članu 147. Statuta grada Novog Pazara;
- članu 96. članu 97. i članu 137. Poslovnika Skupštine grada Novog Pazara

Razlozi za donošenje odluke:

Prijedlog odluke o obrazovanju Anketnog odbora, između ostalog, predviđa da se:

- obrazuje Anketni odbor Skupštine grada Novog Pazara, kao povremeno radno tijelo, radi utvrđivanja činjenica i okolnosti u vezi sa ulogom koalicije SNS – SDP – SPS u pokušaju izazivanja fizičkog sukoba širih razmjera između građana Novog Pazara 18. 19. i 21. decembra 2023. godine;
- Anketni odbor sastoji se od predstavnika opozicionih izbornih lista zastupljenih u Skupštini grada Novog Pazara i to: tri (3) predstavnika izborne liste SDA Sandžaka – dr. Sulejman Ugljanin”, te po jedan (1) predstavnik izbornih lista “Edin Đerlek Gradonačelnik – Promjena je pobjeda” i “Građanski pokret Sandžaka – Za život dostojan čovjeka”.
- za predsjednika Anketnog odbora imenuje predstavnik izborne lista “SDA Sandžaka – dr. Sulejman Ugljanin”.
- Anketnom odboru omogućiti pravo da od organa javne vlasti, službi i organizacija, traži podatke, isprave i obavještenja, kao i da uzima izjave od pojedinaca koje su mu potrebne za izvršenje zadataka zbog kojih je formiran;
- Anketnom odboru stavi u obavezu da povjereni zadatak završi u roku od 30 dana od dana donošenja ove odluke, i da pisani izveštaj sa prijedlogom mjera dostavi Skupštini grada na razmatanje te da upozna širu javnost sa sadržinom izvještaja i utvrđenim činjenicama.

Donošenje ove odluke, odnosno formiranje Anketnog odbora za utvrđivanje činjenice i okolnosti u vezi sa ulogom koalicije SNS – SDP – SPS u pokušaju izazivanja fizičkog sukoba širih razmjera između građana Novog Pazara 18. 19. i 21. decembra 2023. godine.

Razlog za donošenje odluke ogleđa se u potrebi da se javnost, na bazi činjenica, informiše da li je koalicija SDP – SNS – SPS, dovođenjem stotinjak odraslih muških agresivnih osoba sa raznovrsnim predmetima i rekvizitima u rukama koja su zaposjela prostor ispred Gradske uprave 18.19. i 21. decembra 2023. godine, a koja su prema saznanjima MUP-a pristalice SDP-a, od kojih je određen broj njih osuđivan za teška krivična djela, pokušala da izazove fizički sukob širih razmjera među građanima Novog Pazara sa mogućim smrtnim posledicama. U sva tri slučaja, dakle 18.19. i 21. decembra 2023. godine, blagovremeno su prijavljena i najavljena obraćanja, medijima i građanima, kandidata za odbornike i poslanike SDA Sandžaka ispred zgrade Gradske uprave, međutim kako je to i navedeno u isto vrijeme i na istom mjestu organizovano je okupljanje stotinjak agresivnih lica sa ciljem da se upotrebom nasilja onemogući obraćanja javnosti odborničkih i poslaničkih kandidata. SDA Sandžaka je u sva tri slučaja izbjegla izazivanje fizičkog sukoba između građana Novog Pazara. Postavlja se pitanje, zbog čega je izostala adekvatna reakcija državnih organa i zašto niko iz lokalne samouprave, policije, sudstva i tužilaštva nije dao odgovore ko su organizatori ovog pokušaja izazivanja nasilja i opasnosti po živote građana Novog Pazara, koji im je cilj i zašto nisu sankcionisani.

Formiranje Anketnog odbora je neophodno radi utvrđivanja stvarnih činjenica o tome ko su nalogodavci, ko organizatori i ko su izvršiooci ovog pokušaja da se nasiljem postignu politički ciljevi i da se nasilje legalizuje kao sredstvo za ostvarenje političkih interesa. Jedan od ključnih razloga za uspostavljanje ovog tijela jeste i da se utvrdi da li je izazivanje sukoba među građanima imalo za cilj da skrene pažnju sa izborne krađe. Formiranje Anketnog odbora je važno i sa šireg društvenog interesa, da se utvrđivanjem činjenica i njihovom javnom prezentacijom utiče na političko – sigurnosne faktore da u budućnosti ne pozešu za ovim mjerama kojima se ugrožavaju sigurnost i života građana te da se politički interesi i ciljevi ne smiju ostvarivati dovođenjem u opasnost živote građana Novog Pazara. Cilj ovog Anketnog odbora jeste da na bazi utvrđenih dokaza i činjenica predloži odgovarajuće mjere Skupštini grada kojim treba promovirati načelo i stav da se legitimitet ostvaruje na poštenim, fer i slobodnim izborima a nikako na izazivanju sukoba sa potencijalnim ljudskim žrtvama, te da finansijski i politički interesi bilo koje stranke i koalicije nisu vrijedni ljudskih života.

Shodno tome, formiranje ovog Anketnog odbora predstavlja jedan od odgovora kako izaći iz političke i institucionalne krize u Novom Pazaru.

Objašnjenje pojedinačnih rješenja propisanih ovom odlukom:

Član 1: Utvrđen je predmet odluke odnosno propisano je obrazovanje Anketnog odbora.

Član 2: Propisana je unutrašnja struktura Anketnog odbora.

Član 3: Utvrđeni su zadaci i obaveze Anketnog odbora te rokovi za njihovo izvršenje.

Član 4: Regulisano je pitanje unutrašnje organizacije i rada Anketnog odbora te su određeni nadležni organi čija je obaveza da se staraju obezbjeđivanju uslova za rad Anketnog odbora.

Član 5: Propisana je obaveza objavljivanja u „Službenom listu grada Novog Pazara“.

Finansijska sredstva za sprovođenje ove odluke obezbijediće se u budžetu.